

Ernest Mohamed ta splica

PAKICO NO TIN ASINA HOPI INTERES PA BIRA JUEZ

ORANJESTAD (AAN): Aunque cu actualmente tin tres dama ta siguiendo e curso pa bira Juez, e interes pa cu siña pa bira Juez ta masha abao, pa no bira cu practicamente no tin interes.

Esaki ta trece cune cu Hulanda lo mester sigui manda Jueznan pa trata casonan den Corte.

DIARIO a tene un entrevista exclusivo cu Juez mr. Mohamed pa e duna un splicacion pakico realmente no tin interes pa bira Juez. Manera ta conoci, recientemente mr. Mohamed a bay cu pensioen despues di a traha 37 aña den husticia.

Mr. Mohamed ta un di e poco personanan cu a cuminsa di abao y a yega e top.

"Ser un Juez no ta un trabao facil. Ademas cu e ta existi di uno hopi responsabilidad, e ta existi un cambio completo den bo forma di biba", asina mr. Ernest Mohamed a splica.

Bo mester ta un persona cu semper ta refleha caracter, respet y hopi responsable.

Mr. Mohamed a splica cu tur Juez ta traha independiente y esaki ta trece cune cu si bo no ta traha responsable, nunca bo ta keda cla cu e cantidad di casonan cu bo mester trata. E cantidad di casonan ta sigui crece y mirando e hecho cu tur e otro Jueznan tambe ta man yen, bo mester percura pa studia e casonan pa asina tuma un decision al respecto.

PAKICO NO TIN HOPI INTERES

E estudio di Juez ta uno hopi largo. Por sigui e studio aki na Aruba mes, caminda uno ta ser observa pa e diferente Jueznan.

Uno cu ta siguiendo e curso pa bira Juez, tin cu traha na e diferente departamentonan di husticia esta Griffie, Parket, etc. pa asina e conoce e trabao en general.

Mr. Mohamed a indica cu uno por ta hopi bon como Fiscal, pero esey no ta significa cu bo por bira Juez. Bo por ta hopi bon como abogado, pero esey no kier meen cu bo por bira Juez.

ESTUDIO TA DURA HOPI

Un di e motibonan cu hopi hende no kier sigui e curso pa Juez ta cu e ta un curso hopi largo, duro y por bien ta cu na e final di e curso e participante ta worde bisa cu e no ta apto pa bira Juez.

Esaki ta pone cu hopi di e estudiantenan ta prefera di studia pa bira abogado, cu ta un estudio mas corto compara cu esun cu uno mester sigui pa bira Juez.

SALARIO NO TA COS DI GABA

Un otro motibo ta cu e salario di un Juez Arubiano no ta mucho cos di gaba. Un abogado hopi biaha ta gana un salario mucho mas halto cu un Juez, siendo cu e Juez hopi biaha tin mucho mas trabao cu un abogado.

Tambe ta asina cu tin diferente persona den e sector priva cu ta gana mucho mas placa cu un Juez, kende ta un persona cu mester cambia tur su forma di biba y no por asocia su mes cu tur clase di per-



sona.

Segun mr. Mohamed aki uno mester tin amor pa e trabao pero e factor di salario ta uno importante.

Ta asina cu e Jueznan di Hulanda ta haya un suma extra cu ta haci nan entrada mucho mas atractivo compara cu un Juez Arubiano.

Den pasado caba a yega di worde treci padilanti cu mester aumenta e salario di Jueznan ya cu esaki no ta asina atractivo mas.

DIFICIL PA TA JUEZ DEN UN COMUNIDAD CHIKITO

Loke tambe ta un factor cu ta un peso pa un Juez Arubiano, e comunidad ta hopi chikito. Mr. Mohamed no a haye mucho confronta cu esaki, ya cu el a bin di Curaçao y su famia ta uno chiquito y no conoce asina hopi hende den comunidad.

Magina bo como Juez bo tin cu trata un caso di un bon amigo di bo cu antes boso tabata haci deporte hunto, boso tabata sali trip hunto etc. Den caso asina mr. Mohamed ta pidi un otro Juez pa trata e caso y e ta tuma un caso di e Juez. El a indica cu ta masha poco e ta haya su mes confronta cu caso asina. Sinembargo si bo ta un Arubiano, por bien ta constantemente bo ta haya bo ta trata caso contra bo amigonan.

Mr. Mohamed a splica cu e ta prefera di laga un otro Juez trata e caso pa asina evita cualkier pensamiento erroneo cu e lo tuma parti pa e acusado.

El a enfatisa cu como Juez bo ta independiente y imparcial. Bo mester percura pa bo haci un trabao responsable.

Pa un Juez Arubiano cu conoce hopi hende den comunidad, e ta bira dificil. Como Juez bo mester refleha cu bo ta un persona serio, cu caracter, respet y responsabilidad.

Esaki ta encera cu como Juez bo mester cambia bo forma di biba pa bo no drenta den contacto cu tur clase di persona. Compara cu un abogado, no facilmente bo ta haya un Juez ta bishita clubnan nocturno, barnan etc. Esaki segun mr. Mohamed no ta duna un bon imagen di bo persona como Juez.

Mr. Mohamed ta kere cu esakinan ta puntonan cu ta pone cu e interes pa cu bira un Juez no ta asina grandi compara cu e interes pa bira abogado. El a muestra cu e demanda pa Juez ta grandi pero e interes ta hopi abao. Esey ta e motibo cu Hulanda ta manda Jueznan pa tanto Antiyas Hulandes como Aruba.